

Powšitkowne WOZJEWJENJA

njedźelu, 18. septembra 2022

Wusyłanje Božeje mšě

Serbskorěčnu Božu mšu móža wěriwi tutu njedźelu, 18. septembra, w 9.00 hodź. znowa z Chróscic jako livestream scěhować. Link na nju je w interneće pod www.posol.de a na wosadnej stronje podaty.

Na předstajenje hry „Mór a lubosć“

Poslednje předstajenje inscenacije „Mór a lubosć“ budže tutu njedźelu, 18. septembra, w 19.30 hodź. Wšitcy su wutrobnje přeprošeni. Wjace k tomu je pod www.posol.de a w aktualnym wudaću Katolskeho Posoła wozjewjene.

Modlenje w Róžeńće

Na modlenje před Najswjećišim su wěriwi sobotu, 24. septembra, we 18 hodź. do Róžeńčanskeje hnadowneje cyrkwy přeprošeni. Paćerje budu so serbsce a němsce spěwać.

Nyšpor z požohnowanjom konjacych zapřahow

Towarstwo Cyrila a Metoda z.t. přeprošuje wšitkich wěriwych tež lětsa na wosebity nyšpor domchowanki z požohnowanjom konjacych zapřahow. Tutón budže njedźelu, 25. septembra, w 14.00 hodź. w Chróscicach na łuce při Hatkach.

Běh wo pokal zbóžneho Alojsa

Towarstwo Cyrila a Metoda z.t. (TCM), Sportowa jednotka 1922 Radwor kaž tež tamniši młodźinski klub přeprošuja sportowcow wšěch starobnych skupin wot šěsć lět na běh wo pokal zbóžneho Alojsa do Radworja, a to pónđzelu, 3. oktobra. Započatk za wšitkich běharjow je w 9.00 hodź. na sportnišću. Woni móža mjez scěhowacymi čarami wolić: 500, 1.000, 1.500, 2.000, 4.000 a 6.000 metrow. Zajimcy měli so online přizjewić. To je jeničce pod www.posol.de móžne.

Předstajenje spěwohry

Swoju premjeru změje nowa serbska spěwohra „Z TOBU – Bohu swjećene lěto“ pjatk, 21. oktobra, we 18 hodź. w Chróšćanskej wjacezaměrowej hali „Jednota“. Dalše předstajenja su planowane sobotu, 22. oktobra, tohorunja we 18 hodź. a dwójce njedźelu kaž tež pónđzelu, 23., 30. a 31. oktobra, stajnje w 16 hodź. na samsnym městnje. Wšitke předstajenja poskića so ze simultanim přeložkom do němčiny. Na popołdnišich předstajenjach poskići so zdobom dźiwadłowa pěstowarnja za dźěci wot dweju do šěsć lět. Za to zběra so přinošk we wysokosći 3 eurow na dźěćo. Zajimcy měli so z mejlku na don.boskowy-dom@t-online.de přizjewić. Kartki za jednotliwe předstajenja předawaja so pola časnikarja Jürgena Njeka w Chróscicach abo online. Link k tomu je pod www.posol.de wozjewjeny.

Na swětowe zetkanje młodžiny do Lissabona

Drježdžansko-Mišnjanske biskopstwo přeprašuje młodostnych a młodych dorosćenych wot 16 do 35 lět, sej klětu w lěcu na swětowe zetkanje młodžiny do portugalskeje stolicy Lissabona dojeć. Do toho je wobdželenje na dnjach zetkanja w Portoskim biskopstwje planowane. Jězba wotměje so wot póndžele, 24. julija, do wutory, 8. awgusta 2023. Serbska skupina budže při tym džěl diecezanskeje skupiny. Nadrobniše informacije su na młodžinskej stronje KNOTWIŠĆO w Katolskim Posole kaž tež pod www.posol.de wozjewjene.

Modlerske zetkanje za biskopstwo

W klóštrje Marijinej hwězdze w Pančicach-Kukowje wotměje so njedzelu, 9. oktobra, modlerske zetkanje za Drježdžansko-Mišnjanske biskopstwo. Wone steji pod hesłom „Symanje, lubuješ mje?“ (Jan 21). Po witanju w 13.30 hodź. přizamknje so w 14 hodź. modlenje wo duchowne powołanja w klóšterskej cyrkwi z biskopom Heinrichom Timmereversom. Po tym su wobdžělnicy na wzajomnu wuměnu při přikusku přeprašeni.

Duchowny oratorij znowa zaklinči

Na předstajenje duchowneho oratorija „Israelowa zrudoba a tróšt“ Korle Awgusta Kocora su zajimcy sobotu a njedzelu, 1. a 2. oktobra, w 17 hodź. do Budyskeje Marije-Marcíneje cyrkwy přeprašeni. Zarjadowanje wotměje so we wobłuku Lěta Zejlerja a Kocora. Pod wumělskim nawodom dirigentki Judith Kubicec spěwaja chóry Lipa, Meja a Serbskeho ludoweho ansambla (SLA) kaž tež studentski cyłk. Orchester SLA jich z hudźbnikami Sinfonietty z Drježdžan přewodźuje. Zdobom wustupja solisća Romy Petrick (sopran), Britta Schwarz (alt), Patrik Horňák (tenor) a Clemens Heidrich (bas). Twórba zaklinči w orchestralnym wobdžělanju Stefana Malzewa.

Pytaja cyrkwinskeho hudźbnika

Kulowska katolska wosada Marije donjebjeswzaća pyta wosobu, kotraž by po móžnosći hnydom hłownohamtsce městno cyrkwinskeho hudźbnika přewzała, poprawom 40 hodźin wob tydžeń, wo mjenje hodži so jednać. Při tym jedna so wo zastup za čas staršiskeho časa. Tohodla je městno najprjedy jónu hač do klětušeho 31. awgusta wobmjezowane. Štóž ma zajim, měł so pola fararja dr. Wolfganga Křesáka, Cyrkwinske naměsto 1, 02997 Kulow, přizjewić. Nadrobne wupisanje je pod www.posol.de wozjewjene.